

ÞJÓNUSTUSAMNINGUR

DRÖG

Hafnarfjarðarkaupstaður, kt. 590169-7579, hér eftir nefndur bærinn, og Framsýn-Skólafélag kt. 630615-0890, hér eftir nefndur skólinn, gera með sér eftirfarandi þjónustusamning um rekstrarstyrk til grunnskóla Framsýnar í Hafnarfirði vegna nemenda á elsta stigi sem eiga lögheimili í Hafnarfirði og fósturbarna ef fósturforeldrar eiga lögheimili í Hafnarfirði og sækja skólann:

1.gr.

Skilyrði

Skólinn skilar upplýsingum fyrir hvert skólaár til Skólaskrifstofu Hafnarfjarðar um starfsréttindi kennara skólans og allar undanþáguveitingar sem honum eru veittar.

Réttindi og skyldur nemenda skulu vera í samræmi við grunnskólalög, reglugerðir settar samkvæmt þeim og aðalnámskrá grunnskóla á hverjum tíma.

Skólahúsnæði, skólalóð og búnaður skal uppfylla kröfur grunnskólalaga nr. 91/2008, með síðari breytingum og rgj. nr. 657/2009 sbr. rgj. nr. 599/2014.

2. gr.

Rekstrarframlag

Rekstrarframlag nemur 75% af vegnu meðaltali heildarrekstrarkostnaðar allra grunnskóla sem reknir eru af sveitarfélögum í landinu á hvern nemanda samkvæmt árlegum útreikningum Hagstofu Íslands. Innifalið í þeim kostnaði er húsnæðiskostnaður, öll stjórnun, kennsla, sérfræðiþjónusta og annar almennur rekstrarkostnaður við skólastarf. Gildir þetta fyrir allt að 45 nemendur. Skólanum er heimilt að taka nemendur í skólann sem ekki eiga lögheimili í Hafnarfirði, en bærinn greiðir ekki rekstrarframlag vegna þeirra.

Framangreint rekstrarframlag sem er heildarfjárframlag bæjarins við skólann verður greiddur með 12 jöfnum greiðslum síðasta virka dag hvers mánaðar fyrir líðandi mánuð. Framlagið miðast við fjölda nemenda í skólanum í yfirstandandi mánuði, sem eiga lögheimili í Hafnarfirði og fósturbörn ef fósturforeldrar eiga lögheimili í Hafnarfirði. Skólanum ber að koma réttum upplýsingum um fjölda nemenda til Fræðslu- og frístundaþjónustu Hafnarfjarðar fyrir 15. dag hvers mánaðar til að hægt sé að greiða rétta fjárhæð í lok mánaðarins.

Skólanum ber að skila til Skólaskrifstofu Hafnarfjarðar skóladagatali með grunnupplýsingum, þ.m.t. fjölda nemenda á komandi skólaári eigi síðar en 15. júní ár hvert. Starfsáætlun og skólanámskrá skal skila til skólaskrifstofu eigi síðar en 15. október ár hvert í samræmi við form og viðmið sem gefin eru út af Skólaskrifstofu Hafnarfjarðar á hverjum tíma til grunnskóla í Hafnarfirði.

Listi yfir nemendur sem stunda nám í skólanum í ágústlok skal sendur 1. september. Skólanum er jafnframt skylt að veita Skólaskrifstofu aðgang að nemendaskrá og upplýsingum um innritaða nemendur þegar þess er óskað. Rekstrarafgangur af starfsemi skólans skal nýta til að efla skólastarfið sjálft. Skólinn skal rekinn án hagnaðarsjónarmiða og skal óheimilt að greiða arð til eigenda af þeim rekstri sem byggir á opinberu fé. Allur hagnaður sem kann að koma til vegna reksturs skólans verður nýttur til þess að styrkja innviði hans í formi námsgagna og kennslubúnaðar.

Skólinn hefur heimild til gjaldtöku af foreldrum eða forsjáraðilum barns fyrir þjónustu, svo sem skólagjöld og fæðisgjöld. Gjaldskrá skal vera sýnileg á heimasíðu skólans. Óheimilt er að innheimta hærri skólagjöld en sem nemur 11% af vegnu meðaltali heildarrekstrarkostnaðar allra grunnskóla sem reknir eru af sveitarfélögum í landinu á hvern nemanda samkvæmt árlegum útreikningum Hagstofu Íslands. Óheimilt er að hækka skólagjöld án umsagnar fræðslusviðs Hafnarfjarðar.

3.gr.

Innritun nemenda

Skólanum ber að setja sér reglur um innritun sem byggðar skulu á ákvæðum grunnskólalaga og reglugerða settum skv. þeim um skóla án aðgreiningar þar sem allir nemendur skulu eiga sama rétt til að innritast í skólann án tillits til líkamlegs eða andlegs atgervis sem eru aðgengilegar á heimasíðu skólans. Óheimilt er að mismuna nemendum vegna kynferði þeirra, kynþætti, litarhætti, þjóðerni eða trúarskoðunum. Innritunarreglur skulu vera sýnilegar á heimasíðu skólans. Nemendur skulu teknir inn í skólann í þeirri röð sem umsóknir þeirra berast. Fræðsluþjónusta skal hafa aðgang að innritunarkerfi skólans.

4.gr.

Sérfræðiþjónusta

Nemendur Framsýnar eiga rétt á sérfræðiþjónustu samkvæmt lögum og reglum og skólinn ber alla ábyrgð á framkvæmdinni. Kostnaður vegna sérfræðiþjónustu sem og þjónusta við nemendur með annað móðurmál en íslensku er innifalinn í föstu framlagi bæjarins. Við mat á þessari þjónustuþörf skal horft til sömu viðmiða sem sveitarfélagið viðhefur innan í eigin sérfræðiþjónustu fyrir nemendur í grunnskólum bæjarins.

Skólinn getur sótt um sérstaka fjárveitingu til frekari stuðnings nemenda í skólanum úr Hafnarfirði með alvarlegar fatlanir og nemenda með alvarlega náms-/hegðunarfrávik þar sem rökstuðningur og niðurstöður sérfræðinga þess efnis liggur fyrir.

Skólanum ber að senda umsóknir vegna þessarar nemenda fyrir 15. apríl ár hvert til Skólaskrifstofu Hafnarfjarðar fyrir næsta skólaár. Umsóknir verða afgreiddar í samræmi við reglur sérfræðiþjónustu við grunnskóla eins og þær eru hverju sinni. Komi til sérstakrar úthlutunar greiðir bærinn 45% vegna haustannar fyrir 1. nóvember og 55% vegna vorannar fyrir 1. apríl enda hafi skólinn skilað inn einstaklingsnámskrá/-áætlun fyrir 15. október fyrir umrædda nemendur.

5.gr.

Upplýsingagjöf, mat og eftirlit

Skólinn skal viðhafa mat á innra starfi í samræmi við lög um grunnskóla á hverjum tíma og almennt regluverk af þeim leitt. Skólinn skal taka þátt í matsverkefni Sambandsins sem snýr að samstarfi við Vísar rannsóknir ehf. og birtist í þátttöku í Skólapulsinum á hverjum tíma og Hafnarfjarðarbær hafi aðgang að þeim upplýsingum í gegnum Skólavogina líkt og með aðra grunnskóla bæjarins. Að öðru leyti er matsferli innra mats á ábyrgð skólans en skal standast almenn viðmið um slíka framkvæmd og gildandi lög og reglugerðir sem tengjast viðfangsefninu. Upplýsingar í innra mati skólans birtist á hverjum tíma í starfsáætlun skólans í samræmi við viðmið bæjarins um starfsáætlun grunnskóla.

Fræðsluþjónusta Hafnarfjarðar annast ytra mat sveitarfélags á skólanum í skilningi laganna og ber skólanum að láta í té allar upplýsingar sem nauðsynlegar eru til að framkvæma matið og til að sinna

að öðru leyti eftirlitsskyldu sinni. Skólinn skal undirgangast sama ytra mat og aðrir grunnskólar bæjarins. Kostnað við ytra mat skal bærinn bera, fyrir utan eigin kostnað skólans við matið. Skólinn skal jafnframt skila fræðsluþjónustu sömu áætlunum og aðrir grunnskólar bæjarins, sbr. viðmið Skólaskrifstofu Hafnarfjarðar til starfsáætlana og skólanámskráa á hverjum tíma. Breytingar á starfsemi skólans milli útgáfa starfsáætlunar og skólanámskráar skal kynna bænum sérstaklega og skriflega.

6.gr

Ársskýrsla

Skólinn skal skila ársskýrslu ásamt ársreikningi til fræðsluþjónustu Hafnarfjarðar fyrir 1. maí ár hvert fyrir liðið fjárhagsár.

7.gr.

Endurskoðun og vanefndir

Samningsaðilar geta óskað eftir endurskoðun á samningi þessum í heild eða einstaka þáttum hans komi til verulegra breytinga á forsendum sem hann byggir á eða vegna breyttra aðstæðna sem ekki var séð fyrir við samningsgerðina. Samþykki báðir samningsaðilar að fram fari endurskoðun á ákvæðum samningsins skal henni lokið innan þriggja mánaða frá því samþykki lá fyrir.

Ef verulegar vanefndir verða á einstökum ákvæðum samningsaðila um faglegt skólastarf að mati bæjarins og þær varða velferð barna í skólanum, skal hann gera skólanum skriflega grein fyrir því og óska úrbóta innan sanngjarns tíma miðað við eðli máls. Skólinn skal svo fljótt sem auðið er finna leiðir til úrbóta og framkvæma þær. Telji bærinn úrbætur ófullnægjandi er honum heimilt að rifta samningnum og fellur hann þá þegar úr gildi.

Ef gefið verður út sérstakt form af gerð þjónustusamnings af hálfu mennta- og menningarmálaráðuneytis/Sambandi íslenskra sveitarfélaga, hvenær sem er á samningstímabili, verður samningurinn endurnýjaður í samræmi við lög um grunnskóla á hverjum tíma í samræmi við það form.

8.gr

Endurskoðun og uppsögn

Samning þennan skal endurskoða að ári liðnu frá fyrstu gildistöku hans. Þjónustusamningur þessi er uppsegjanlegur af beggja hálfu með eins skólaárs fyrirvara og skal uppsögn að jöfnu taka gildi við lok skólaárs. Umsagnarákvæði hér er óháð 7. gr. hér ofar.

9. gr

Afturköllun viðurkenningar

Afturkalli mennta- og menningarmálaráðuneytið/Menntamálastofnun viðurkenningu skólans fellur samningur þessi tafarlaust úr gildi án uppsagnar.

10.gr.

Lög og reglugerðir

Um skólann gilda sömu lög og reglur og um grunnskóla samkvæmt 1. gr. laga um grunnskóla, eftir því sem við á. Þar á meðal skal af hálfu skólans fylgt ákvæðum stjórnáráðslulaga við töku ákvarðana sem kæranlegur eru skv. 47. gr. grunnskólalaga. Það á þó ekki við um ákvarðanir um gjaldtöku.

Samningur þessi er gerður samkvæmt 43. gr. grunnskólalaga nr. 91/2008 með síðari breytingum og reglugerð nr. 699/2012 sbr. reglugerð nr. 599/2014.

11.gr.

Varnarþing

Komi til þess að mál verði höfðað vegna ágreinings um samning þennan skal það rekið fyrir Héraðsdómi Reykjaness.

12.gr.

Hvorugur aðili verður talinn hafa brotið gegn samningi þessum, þegar honum er ókleift að uppfyllta samningsskyldur sínar vegna atvika, sem rekja má til óviðráðanlegra ytri atvika (force majeure), s.s. vegna alvarlegra slysa, stríðssátaka, náttúruhamfara, deilna á vinnumarkaði, fyrirmæla stjórnvalda eða annarra óvæntra og ófyrirséðra atvika, sem samningsaðilum er ekki unnt að fyrirbyggja.

Enurskoðun samningsins skal tekin upp sex mánuðum fyrir samningslok

Gildistími samnings er til og með 15. júní 2018

Hafnarfirði, dags.

f.h Hafnarfjarðarkaupstaðar

f.h Framsýnar skólafélags